

CHINESE - JAPANESE LIBRARY OF  
HARVARD - YENCHING INSTITUTE  
AT HARVARD UNIVERSITY  
DEC 17 1940

3776/0.9 (7)

17

T5419/4245

白華樓吟稿卷之六

歸安茅坤順甫

邑人姚翼翔卿編

五言律詩

郁生東歸海上遲久不至賦詩招之

陸機擅當代君復起雲間大雅誰能依西京

已樂客外照若水紫氣滿吳關何以遲

君不來

國府七人相上

白華樓吟稿卷之六

哈佛大學漢和  
圖書館珍藏印

歸安茅坤順甫著

邑人姚翼翔卿編

五言律詩

郁生東歸海上遲久不至賦詩招之

陸機擅當代君復起雲間大雅誰能振西京早  
已攀客星照茗水紫氣滿吳關何以遲青鳥  
書去未還

同祥上人湖上

湖上多佳氣攜僧與轉幽綠蘿牽徑入蒼靄  
林投草色憐康樂桃花笑惠休仰天忽大笑疑  
共虎溪遊

病中偶誦孟浩然多病故人疎之句慨然  
有感賦詩三首

勿厭故人疎秋來菱自除年華且若此世態欲  
何如三徑蛛絲滿孤齋鶴氅餘支頤北窻下猶  
得白雲俱

勿厭故人疎幽心與道俱嵇康愛爬蟲莊叟試

觀魚落木驚飛鳥寒泉響暗渠足音斷空谷聊  
對養生書

勿厭故人疎蕭蕭世俗餘雲煙互阡陌桑柘滿  
林間喧豈隣家獵歌應隔水漁此心誰與語凭  
几理方書

亡婦大祥兼哭小妾

白頭吟早謝忽已再星霜遺業漸中落衰齡強  
自將那堪朱瑟罷併及綠珠亡地下如相見雙  
憐寸斷腸

病臥

病骨臥云久故交日以疎蛛絲網藥裹蝸沫蠹  
方書午夢嚼花鹿朝憐戲藻魚呼童問三徑那  
得載籃輿

許敬菴吏部服除赴京謁選簡寄

鳴騶初候吏畫省舊分曹無歎積薪久還憐起  
草勞江湖我中散霄漢爾山濤別路何相贈腰  
間脫寶刀

病臥深夜感秋聲

不是悲秋客偏來浙瀝聲逶迤洞房曲迢遞落  
花輕夜靜燈無語霜寒杵不鳴云何獨蕭瑟頻  
入病魂驚

陳華山刺史以憂歸過訪病榻感舊論文

二首

共惜十年別那堪兩鬢摧我初尸蹶起君復墨  
衰來攜手欲流涕拏花且舉盃草玄何必問六  
藝已秦灰

眉山頽已久爾雅竟誰傳不遇問奇叟終成覆

醬玄洗盃邀北斗看劍倚中天揮塵發長嘯無  
嗔醉後顛

壽鄰翁沈丈

甲子忽已遍况復病相侵無惜黃金散還邀白  
社吟南鄰爾投轄比里我攜琴雙鬢各衰颯何  
妨日日尋

病後過仲兒時丁丑臘月二十八日

文園病已久臥榻半塵埃餞臘花將吐悲秋客  
始來寒氛餘鳥雀殘雪雜莓苔嘗藥深憐汝歡

逢獻歲盃

哭亡妾并兒媳

姑也殯猶臥婦兮櫬復陳如何一暮月遽哭兩  
亡人素帳乍如偶黃泉應與親對兒相嚮泣蕭  
瑟倍傷神

賀李邑侯壽誕

何以題仙令雙鳧日外來東風一夜到滿縣百  
花以南極迎佳氣中天獻壽盃况聞白雪曲縹  
緲琴臺

春日過吳江訪沈鐵山

攜春自茗上百里過江亭手折梅花碧馬嘶芳  
草青嚼盃歌積雪看劍舞寒星夜半猶耽飲懽  
來醉復醒

沈鐵山春暮過訪山中送之東遷惜別一  
首

百里攜春過君歸春亦歸花枝殘別路柳色黯  
征衣瑟向伊誰鼓歌憐和者稀五湖應不遠倘  
許共漁磯

予過訪環溪丈其別去也將訪名山於錢  
塘之上行里許適大雨迺復還宿環溪齋  
中賦詩紀事

頃已攀雲別何當帶雨還琴仍臥竹裏奕復對  
花間樹色疑連袂江聲故抱關客心從此折何  
處訪名山

過武康雙橋山中弔亡妾

無復窺妝日翻悲埋玉年名山償夙約佳氣鬱  
新阡從此重泉閉誰同明月懸欲攜環與珮須

卜再生緣

雨宿湖上

臥雨西湖上，羈心何處投。  
鮫人疑避客，山鬼欲悲秋。  
枕落魚龍嘯，窗懸薜荔愁。  
猶聞漁唱起，吹笛遍滄洲。

趙溧陽攜酒秋園宴集

西湖秋色好，誰借入林中。  
薜荔攀屏翠，芙蓉落檻紅。  
脫巾挂深竹，徙席過疎桐。  
日暮蟬聲裏，猶言興未窮。

李珠山載酒吳山道院，邀施虎泉、沈龍洲、馬松里、趙望雲、陳貞亭、并豫章、陳竹廬暨予，共爲社飲於吳山道院，得仙字。

道院阻吳山東麓，而左盼西湖，右望江。且越州諸山屏列，隔岸若畫眉。然歐陽公嘗稱錢塘盡東南山水之美，而有美堂則又盡錢塘之美。予竊自憐平生好佳山水，茲特錢塘市中，豈卽有美堂故址也乎？予獨遺而不及，不能不爽然自



失也卽席口占四韻爲諸公倡云

豈知城市曲別結洞天緣吳越窻中劈江湖掌  
上懸煙花饒百二樓閣俯三千不羨西王母瑤  
池宴列仙

許少崖使君棹美人於西湖之上席上口

占二首

西湖佳氣多况復洛神過艷擬日初出糝疑水  
不波魚龍驚欲起花柳鞦韆如酩共指天街上星  
裝夜渡河

猶言興未盡別棹擁琵琶波亂珊瑚色雲搖翡翠  
花畫眉邀遠岫舞帶漾流霞歸路人爭羨西  
施醉若耶

賦得高樹晚涼歸

高樹敞殘暉晚涼何處歸人天共掩靄花露漸  
霏微暝色窻間入泉聲竹裏飛還看初沐起銀  
漢挂絺衣

陳竹廬同客西湖已而移聖水禪房題寄  
未了西湖社言逃聖水禪攜瓢挂絕壑面壁習

金仙掌上天花落林中梵唄傳到來題偈語倘  
許寄漁煙

昭慶禪房與曹懷靜對局偶爾口占

看君手彈處指顧欲風生自擬萬人敵那知一  
敗傾戰酣初蟻鬪局罷總經聲習靜天花裏嗒  
然仙梵情

曹懷靜移居七寶山晚秋過訪戲贈一首

年來四壁立何事復攜家爲厭紅塵市言棲琪  
樹花一瓢挂薜荔半榻構煙霞醉傍寒蟬臥孤

吟清露華

酬張少谷

客臥西湖上詩名滿貴游人懸青玉案江作墨  
池流花外看雙劍林中擬四愁歌君題贈什萬  
里貯清秋

陳竹廬之投西湖吟社也甫旬卽辭去且  
聞其南遊金陵北謁闕里陟泰山然後歸  
於是社長李珠山邀諸君賦詩送之題其  
冊曰遠遊醉賦二律

一瓢聊上裝千里不齎糧山水逢佳處風煙卽  
故鄉海天高士傳象緯少微光何日西湖上重  
逢陳子昂

興來當絕壑處處入攀躋山色褰衣帶煙花亂  
馬蹄三都豪士賦五嶽洞天題誰謂清秋裏王  
孫芳草萋

沈貴池罷官歸養痾溪上寄贈一首

聞君挂冠後長日臥中林醉倚胡牀嘯閒隨流  
水吟囊中不死草架上無絃琴卽此逃人境何

須蓬島尋

冬月再過西湖未及過候社中諸友簡寄  
猶劇秋來興重於歲晏過社遊知不厭題什却  
誰多花外星應聚林中鳥亦歌山靈邀劒珮暫  
爾滯煙波

過先師來菲泉先生廬兼致兩公子

少年問經處花木共依然無復絳紗幄堪悲立  
雪年賜書應蠹字遺草尚塵編卿輩還須讀家  
聲奕世傳

訪來三峯年丈

少時同結綬末路各抽簪家特一江隔年來雙  
鯉沈文移別後草琴寫夢中音欲脫佩刀贈相  
將白首心

次蓬萊驛望禹穴

停車一以眺佳氣掌中懸玉笈千年字金函五  
色編但教山鬼護不竝代崇禪稽顙蓬萊外氣  
氤駐綺煙

山陰道中

不特江山秀還兼風物殊千林魚稻市萬井冕  
裳區游徼絕椎剽人煙入畫圖移書弔勾踐可  
許上塵無

過聖水寺訪覺上人遇題壁一首

到來僧不見始解入空林相對藤蘿影那聞鐘  
磬音慈雲宿巖頂慧月桂花深獨向蒲團坐閒  
看無住心

送屠山人還越

一瓢五湖畔澹宕欲忘年少奉浮屠法人呼賈

閩仙但餐花下露不拄杖頭錢此日歸東越飄飄滄海煙

雨夜宿涵山道中

不堪風雨夜江上一孤舟已怯圖書潤還添僮僕愁林昏疑拒客溪響共悲秋抱膝發長嘯堪憐似楚囚

贈陳竹廬

席上逢驚座詩名江海間五言稱獨步大曆許誰攀對客數岍幘當盃頻洗顏何須婚與嫁共

汝訪名山

春夜再過南石樂餘園

傳燎入花隙循除轉竹深疑非人境接別向洞天尋到此斷塵想坐來生道心中林誰是伴月色與藤陰

臨安道中簡舊令劉瀟湘

有序

瀟湘之令臨安多惠政邑諸生某某堂屬予碑予適久之未報頃過邑之青谿上問諸父老諸父老稱不置口予輒賦

詩一章并碑記以報

抱琴人不見我過問棠陰無復當年調猶聞流水音磨崖屬已久題字豈應沈寄語太丘長中郎少愧心

新安道中偶題

一隘一亭障天開虎豹關不須列烽燧自可繕河山海內金錢布區中甲第園先朝產英特割據六州間

六代時有汪王割據六州云

新安道中遇雨

羈旅多愁雨况兼行路難那堪裝盡濕併怯劒生寒鳶站一絲挽羊腸百折盤解言遲夕霽乘轡下新安

一入歙州界偏逢日日陰山靈疑已避何處訪知音不及舉帷眺祇慙抱膝吟林間發長嘯誰解客星臨

晚霽西望雲巖諸山

天忽挂長虹掀髯欲御風山光迎返照劒氣屬層空雨歇千峯出煙消四望通白雲看不盡冉

冉起封中

過歙州弔同年鮑三峯汪虛舟游鮫潭潘

直原胡斗潢胡梅林六公二首

諸公已仙逝我愧獨晨星攬此山川槩能無涕  
淚零浮名升與降世眼醉還醒萬古俱流水應  
憐墓上銘

諸公且勿道司馬最堪悲百戰功猶在祁連葬  
獨遺誰能訟延壽我欲弔鴟夷祠宇錢塘上千  
秋墮淚碑

過歙州許太常行三日矣追送不及題詩

寄上

江上古星象山中挂臥爐我來投佩劍誰爲讀  
藏書悵望美人色含情芳草墟浮雲總西北千  
里願同車

休寧道中讀鄉社碑

邑稱富溢然故習悍鬪近年來始爲鄉  
社約予過社亭讀令碑知里中稍稍息  
睚眦矣感歎不已系之以詩

邑中十萬戶富溢勝臨淄好俠偏輕鬪逢人或  
裂眦年來習俎豆稍已厭刀錐日暮鄉亭上低  
徊讀今碑

過天門

一行穿一障千折引千嶺爲站層巖外人煙下  
界中憑欄舉北斗揮手捫飛虹客問山翁姓前  
身是葛公

從休寧道中望雲巖

翠屏天外障遙指是雲巖暮露寒仙掌乘風掉

石帆九霄瞻寶界千里拜金函忽覺靈化墜翻  
翻引絳繆

從第一仙關入步雲亭二首

去天特盈尺轉嶂復千峯縹緲星河引氤氳雲  
樹重飛泉挂瓊玖削壁秀芙蓉箇是神仙境行  
鞭赤玉龍

不必問蓬萊今朝接上台肘飛萬花谷身入九  
成臺雲外芝幢引天邊鶴吹來劍光生赤電早  
已决塵埃



道士迎天梯峯俄而山下雨作紀事

却怪山靈幻陰晴半馬蹄雲霾沉下界日氣射  
天梯捫磴層睇豁回看入望迷何當屐齒遍併  
屬洞霄題

晚霽同道士蘭谷步香爐峯前

薄暮微風起層林宿雨收瑤壇河影挂碧殿夜  
光浮笙吹天邊度芝幢檻外流巖燈颺不定疑  
是弄珠遊

別雲巖

我來興未盡去矣復淒其霧壑迷行旆煙蘿戀  
別帷山靈解好客墨子亦貪奇一步一回首鐘  
聲出岫遲

由雲巖下乘流放筏出池溪二首

連朝冒飛幘茲夕暫臨流言踏名巖遍還尋芳  
杜幽青山夾兩岸綠水射中洲自笑乘槎出行  
看問斗牛

斗牛何處問山水遊仙情采碧還乘興臨流解  
濯纓却貪杭竹迅無復櫂歌行不似茗溪上煙

波臥月明

次淳安漆樹嶺

前峯指漆嶺忽動故鄉心  
漸覺聞吳語還看解越吟  
關河間行旅山水共鳴琴  
拍手發長嘯誰同澹宕音

題王山人喬松圖

山人手種松今已舞蚪龍  
秃爪雲霄迴蒼鱗煙霧重  
但傳幽壑籟不羨大夫封  
寄語陶元亮盤桓共短筇

題米灘口

獨愛歙州山行行去復還  
一峯一磬折萬壑萬重關  
虎豹盤空外龍蛇叢靄間  
何當引康樂日日此躋攀

過釣臺再讀往年鑿壁之作輒賦

幾過釣臺下頻將弔草投  
茲行無一字猶爾悵千秋  
綠水洲前瀉白雲巖上流  
殘碑蘚已遍一度一翻愁

夜行江上

江行多爽氣况復夜凉時  
森森擢歌曲盈盈芳  
杜枝鮫人渾不語騷客  
總宜詩千里煙波興隨  
風縱所之

由訪雲巖東歸過西湖上

日暮西陵道回看千里雲  
羈心隨候變鄉語隔  
花聞肘後青龍劔囊中  
玉笈文一瓢煙水上自  
笑武夷君

送李少尹歸田

聞說罷官日橐中無一錢  
但攜新賦草歸臥舊

瓜田父老空城送兒童  
夾路傳他年碑德政  
陸  
淚峴山前

鍾生自囚舍中貽予詩題答一首

獄中書一札客豈漢鄒陽  
開緘欲流涕微吟堪  
斷腸三年宜不雨六月  
恐飛霜誰爲省囚草釋  
君還故鄉

春陰

榻來羈旅日日對春陰  
不解東風思堪憐遊  
子心寒鷓流阮嘯過鴈  
入嵇琴岸幘獨危坐誰

同歎陸沈

獨坐

不堪江海思况復薜蘿寒  
獨坐看龍劍誰爲問  
鷓冠支頤強自臥抱膝起長歎  
一卷庖犧易青  
燈暮雨殘

早起

早起憑烏几嗒然無一塵  
不堪連日雨疑滯百  
花春世事拚投老浮名且避人  
還嘲形與影疑  
是漆園身

夜過施南石

經時不相見况復病間過  
共惜別來鬢寧辭花  
下歌溪聲瀉林杪月色挂巖阿  
夜靜欲歸去心  
猶戀薜蘿

李少白過訪賦贈

白也詩無敵風流復見君  
劍光寒射斗賦草氣  
凌雲恥作貴游客還應藝苑聞  
却憐挂冠叟花  
下共論文

清明日展祖墓因悼亡兒一首

從汝遭家難攜誰讀父書不聞供祭掃况復大  
門問腸斷一杯土羞稱千里駒松楸疑助泣垂  
露欲潛如

贈江掾二首

一掾非君好五言聊自持欲將文飾吏恥以律  
爲師俸薄或輟金官閒不廢詩年來趨府暇共  
我數招攜

聞君展丘墓言復謁明光暫以鷓鴣言隨鷓  
鷺行彤庭御氣近紫禁漏聲長江左半宮沼還

攜奏尚方

時湖中  
適水災

夜過聖水禪房

日暮投蘭若雲深禮釋迦不知秋作客暫習梵  
爲家香供三千界人天億萬沙何當謝世幻長  
此臥空花

三茅觀夜歸

攜客向煙蘿嚼盃眺夕波湖當吳市迴山入越  
州多千里褰衣帶三秋落嘯歌歸林傍棲鳥猶  
共戀巖阿

過金山寺

誰劈一拳石獨撐萬里流西迎江漢色南拱帝  
王州龍象三千界山河百二收我來思解帶還  
爲故僧留

夜訪呂山人不遇

夜過寒江上空林不見人到門惟落葉流水隔  
飛塵殘塵猶挂壁孤桐誰與陳解維向煙渚鳧  
鴈許爲鄰

王敬所司寇秘蹤西湖之上移書共尋一

首

千里傳書札相呼入翠微不令津吏諜共看野  
人衣山鬼林間嘯江靈雲外飛仰天忽大笑攜  
向月明歸

歲暮雪夜泊舟武林道中

羈旅多蕭瑟何堪雪色侵凍雲千里合宵漏萬  
家沉過鴈寒無影棲鳥夜不禁陽春倘許借願  
爲入琴音

黃吉所下第後雪中過訪

嗟君萬里鵠雙翅雪中垂恥向檜榆擲堪憐燕  
雀隨長鳴慙獨息顧影未逢時佇看雲霄上銜  
恩入鳳池

張見山丈過訪山中

少年多任俠却似五陵豪座上邀珠履花間脫  
寶刀興來猶澹宕醉後迴風騷此日雪殘鬢堪  
憐已三毛

庚辰三日夢中得遊仙詩六句已而半醒  
復夢續二句

風塵殊不適麴蘖卽爲家言以中林興閒尋幽  
洞花瓢間攜日月掌上弄煙霞欲事長生訣何  
須永與砂

錫山費生者予未之面也友人余君棠哦  
其詩亟稱其繪畫與書法且云其人偏盲  
然近古之節俠者也來索予詩贈以四韻  
風流杜子夏曾不厭偏盲繪摹輞川勝詩尋大  
曆盟習書池半墨學劒氣橫行憐我逃虛久秋  
江數寄聲

過天機上人禪房讀亡兒題偈有作

風燈曲逾曲煙蘿深復深豈知穿絕壁猶爾挂  
禪林覺草印麋跡空花散梵音兒曹題偈處能  
不淚霑襟

題黃鵠贈余生

嗟一黃鵠翩翩何所求豈應唼孤藻長此滯  
滄爾須矯搏風翻還為萬里遊天池與太液恣  
清秋

吳沈二丈過訪齋中贈別



禪林枕城曲樹裏掛江湖井邑遙連越樓臺半  
控吳蜃波緹望合鐘靄入看無願向山靈借攜  
歸品畫圖

吳宋二丈共尋西湖予恨不及從題寄一  
首

湖上試輕舸凌波羨爾曹樓臺共掩靄荷芰迴  
風騷露氣裊飛檠煙光上野袍如何獨偃臥枕  
石聽松濤

贈超然上人二首

年少抱詩癖人呼賈浪仙已超三乘幻併屬五  
言傳杖錫曇花靄挂瓢鳥路煙我來多澹宕共  
爾暫棲禪  
橐空不厭貧釜輾數攜賓半榻藤蘿月一瓢麴  
米春醉同齊繡佛醒共轉燈輪落日巖前嘯中  
天無片塵

程徵君載酒湖上

言別西湖久何堪載酒過山靈遙弭節仙媛忽  
凌波花氣迎環珮煙光照綺羅醉歸歡未已日

暮擁笙歌

湖上題贈二首

一片傾城色偏宜水上看照眉疑遠岫轉盼似  
迴瀾嘖笑嬌猶澁琵琶妬不彈忽聞歌白雪鮫  
室晝生寒

湖光十里碧倏爾發朝霞綽約魚龍夢娉婷荷  
芰花歌唇隔浦度舞袖帶風斜片石迎波上翻  
疑待浣紗

席間覽優人演習薛仁貴傳記感故督府

胡公以罪沒於今猶未獲 賜葬也系之  
以詩

古來摧戰士豈特薛幽州漢代悲飛將秦人泣  
杜郵中原罷羽檄幕府臥輕裘誰問胡司馬功  
成殞一坏

聖水寺益上人過訪花溪之上賦贈一首

聖水別已久清宵夢幾回忽逢折蘆過疑爲獻  
花來坐上三生悟林中五蘊開禪心與溪色此  
夜共徘徊

余見華冬夜過草堂席間醉贈

予也畏小友君爲狎長髯不覺坐移日相看狂  
欲顛李泌同張說終軍共馬遷古來論交處知  
已總忘年

宋少尹赴荆門

荆門控江漢自昔號名都井邑饒魚稻山川入  
畫圖棘裝輦駝笮蜀將酋下巴渝千里宦游處知  
君興不孤

贈吳丈二首

君豈於陵子其貧却世憐一瓢挂藤影半榻枕  
蝸涎顧嫂無罌粟逢人少社錢年來抱碁癖數  
過草堂前  
年來多澹宕歲晚數招攜調鶴君揮拂看雲我  
杖藜興來花共舞醉後石同題客問雙髯姓前  
身阮與嵇

春夜由雪溪東歸紀事

明月挂谿流况兼山色幽煙花天際入象緯掌  
中浮人境拭如畫客心悲欲秋劃然發長嘯餘

響遍滄洲

茗上逢楊用吾囊藥過訪

茗川一以望紫氣類非常五色囊中草千金肘  
後方何期跨白鹿忽爾駐丹房憐我文園臥還  
投石髓漿

胡英山攜書酬寄一首

何處抱琴客忽遺千里音微風自遠至散曲入  
花深君已傳循吏我仍臥墨林竭來未同調江  
上獨招尋

仲兒同劉行素黃吉所讀書山中兒與行  
素比試於京而吉所留浙闈也賦別一首  
連袂一朝別分裝千里行天隨鴈影隔風入馬  
蹄輕解額秋雙擢傳臚春幾聲翻飛鳳池曲知  
慰倚閭情

茗上逢台州司理俞定所賦贈

聞君露冕處半屬遊仙翁井邑雜鮫室波濤狎  
蜃宮愁經天姥雨嘯捫石梁虹此日雙龍劍翩翩  
紫氣冲

秋夜余見華過訪一枝窩燕集

一枝秋水客過共徜徉劍氣倚天碧笙吹帶  
雨涼嘲兮形贈影歌也短兼長拍掌乾坤小休  
猜嵇阮狂

王槐亭使君由工部出按興泉以詩送之  
并簡故人王太僕東臺先生且許其千里  
過訪也二首

美爾奉朝請一年還一遷忽聞採風使擁傳下  
江天繡斧潮聲裏霜戈蜃氣前遙知按州郡半

是習遊仙

太僕別來久髯猶昔日無竹間誰對奕花裏夢  
投壺我尚肘堪翼年來興不孤何當過三笑共  
作虎溪圖

得上人過訪齋中

淵明三徑開支遁九秋來竹塵挂藤影蒲團問  
劫灰已能超忍辱何事掃塵埃坐久默無語月  
明花下盃

三姪順天鄉試下第以詩慰之

劉蕢再下第海內竝羞顏且橐青龍劍重遊太  
學關閉門謝朋舊削髮入名山我共白頭父行  
看畫錦還

秋日過吳山道院聽琴

逆旅初流火翻驚白雪飛林中忽崖裂座上似  
秋歸逸調傳空谷商音轉翠微曲中猶未已縹  
緲送殘暉

贈曹山人

君豈漢曹丘三言從季布遊到來稱上客名已動

南州自笑舌猶在相逢轄早投當盃不忍別鴻  
鴈一聲秋

張山人過訪二首

門已堪羅雀客偏枉故人自言室似磬近午甑  
猶塵岸憤恥彈鋏挂瓢歌負薪古來嗟不食疑  
或是前身

年來四壁立不特似悲秋臨水發孤嘯支頤臥  
一丘送窮文已煨嘲影澹無求此日滄洲上相  
攜對白鷗

九月八日喜桐廬俞小江過草堂夜話

江上客星過泠泠蘭杜芬飄攜千里月劒合九  
秋雲殘燭翠屏靜疎簾白鴈聞歡深忘漏未此  
夕慰離羣

次日再贈二首

不必登高飲已看落帽狂茱萸雙鬢短時序百  
年長隔水霜逾白疎籬花復黃共君歌且舞醉  
夢入羲皇

已覺語難盡不堪思轉深乾坤百年感江海故

人心白眼兼青眼長吟復短吟平生豪俠興誰  
共解浮湛

上饒翁徵君載古書名畫過訪賦贈一首  
客傍清秋過米家書畫船橐中貯蚪蚪掌上吐  
雲煙座似懸周鼓林疑對輞川還應神夜護山  
鬼嘯燈前

輓馬松里公詩

故通政馬松里公今之賢豪長者也方  
其爲御史時按節河朔予適提兵過之

公嘗首疏論薦謂可當閫寄而授節鉞  
者已而予坐誅奪官公又約臺諫諸公  
共爲論救而執政沮之予雖罪廢而於  
時公議亦稍稍振中外矣未幾公亦棄  
官歸二十年來數邀結社湖山之間分  
曹賦詩相爲唱和蓋欣然樂也今松里  
公忽爾仙逝予哭不能已因賦詩七章  
以附古者招魂之旨云

天象闕文昌豪雋遽爾亡江山痛欲裂日月恨



俱長不見人中鳳應爲地下郎我來投弔草垂  
涕忽沾裳

早已罷朝請竭來從社遊幾攜花下酒同上水  
邊樓落木分巖嘯凌波起櫂謳賞心不再得無  
限古今愁

薦草篋猶歸看花盟已寒却憐乘羽化無復共  
盃歡人向泉臺闕林悲玉樹殘百年歎知己誰  
爲問彈冠

佩劍許已久銘阡還屬誰平生多故舊若箇最  
相知吏業臺中草巖棲社裏詩吾將類遺稿聊  
慰百年思

聞道素旄出還遲白馬臨生前交不淺沒後淚  
偏深薤露歌初咽山陽笛已沉西湖流日夜難  
寫故人心

湖山不改舊湖社尚誰依漸覺鷗盟冷行看花  
事稀苔封調鹿徑雲鎖釣魚磯欲草招魂賦君  
今歸不歸

沈約已歸土馬融復罷帷社遊半凋落誰爲共

棲遲處士湖邊墓越王江上祠他年拄杖過雪  
涕讀題詩時沈青門死而  
葬已三年矣

秋日過西湖

秋色微茫裏蕭蕭半有無淡粧橫碧落淺黛入  
寒蕪抹却綺羅艷但教煙雨圖瀟湘多逸調此  
夕桂西湖

社友李珠山六人攜酒聖水禪房宴集

載酒招攜處何如晉竹林分曹大小賦選壑短  
長吟阮嘯傳空籟嵇琴寫梵音興來不覺醉共

舞散花深

輓俞泉亭教授三首

聞君忽仙逝何處賦招魂花沒淵明徑林餘長  
統園遺文留敝篋舊業覆頽垣應共前江叟空  
山載夜猿前江卽字  
泉亭弟

哲人已云逝舊德杳難追誰識延陵墓堪爲有  
道碑社吟知已寢邑誄豈無悲寄語太丘長溪  
毛薦一壘

還聞未訣日飲涕只遺孤解有張堪在能忘趙

武無父書猶可讀先業未應蕪况我年雖耄相

將百足扶泉亭遺孤年止六齡  
托姪汝彝撫之故云

同張海方山行

行行谷轉幽况復迴清秋磴縮煙光入泉分石  
竇流白雲如有待好鳥獨相求笑向山靈語一  
瓢許挂不

張海方遊金陵來歸歲暮再過草堂感賦

二首

不堪千里過况復九秋殘劒帶藤蘿色衣餘薜

荔寒計程品山水膝席共悲歡借問都亭上公

卿誰餽餐

誰謂洛陽客猶歌行路難竭來遠遊賦都作覆  
瓿看天地雙蓬鬢風塵一鷓冠孟嘗罷相久猶  
喜舊馮驩

壬午至日張海方吳養貞草堂夜宴

葭管灰初動黃鍾律漸回望中佳氣入花外客  
星來已解合歡舞併傳行慶盃霜飛夜未艾何  
處祝三台

同張海方對雪賦詩二首

不特豐年兆還添客興奇寒氛屬賦草爽氣漱  
詩脾似瀉銀河液如牽瓊樹枝仙人蓬海上萬  
里盡瑤池

看君歌白雪逸興獨豪華似共梁園賦如攜謝  
眺家吟眸盪林薄俠骨入風花豈學五陵貴紅  
爐擁狎邪

夜宿新市道中

野宿青谿上谿寒咽不流蒹葭藏水市鴈鴛帶

林丘月射鮫人室煙橫賈客舟興來發孤嘯不  
盡古今愁

雪夜過西湖

西湖最佳處雪色半酣時已却顰鳥花媚獨妍山  
水姿風吹疑碧海月挂似瑤池復唱漁家傲煙  
波狎釣絲

朱訥齋雪夜過茗城不及追陪題寄一首

天上謫仙過山靈亦解迎却憐灌園叟猶爾隔  
江城紫氣吳關抱客星茗水明中庭忽飛鴈聊

爲寄春聲

詠竹絲燈

誰向淇園剪裁爲五色絲庭猶傲雪榦花已吐  
春枝公子珊瑚樹仙人冰玉姿繁華併澹宕總  
入我題詩

二月十日晨起爲縉兒扣謝文昌祠

何處瞻星象名香手自焚望中遙下拜花外恍  
如聞金馬招方朔甘泉檄子雲夜過北斗畔已  
爲助郎君

友人陳康衢以詩酒而癖者也山堂膝席

口占戲贈

少小投詞苑年來客醉鄉出風還入雅浮白併  
流黃到處徵高調何言署太常中林暫傾倒宛  
似共柴桑

來君念過訪賦贈并柬寄迺兄晉卿

林中逢小阮未及大馮君鴻鴈一行影江天兩  
處分鬢連殘歲雪衣共隔江雲折取梅花寄無  
忘千里聞

贈沈忠宇文學

沈兼習  
堪輿術

名已貴游徧神如秋水揚非稱秦博士併解漢  
青囊今古掌中劈山川瓢裏藏相看何以贈臨  
佩脫干將

偶讀莫中江公扇題山莊之什翛然王右

丞陶彭澤遺響也賦寄一首

伊人久不見題扇却誰遺響落朱絃奏情看瓊  
樹枝輞川忽在眼柴桑空自期何當拄杖過共  
採南山芝

過王氏橫山草堂追感雨舟公之舊且喜

諸孫之翩然玉立也情見乎辭

摩詰沒已久輞川似可憐圖書散舊客花鳥貯  
當年半榻芝幢日一簾蘿帶煙條然竝玉樹邀  
我草堂前

夏日同友人露坐夜飲

不須厭朱夏露飲亦清秋灝氣穿林瀉涼雲拂  
檻流炎氛花外散象緯掌中浮對此且沉醉頽  
然臥一丘

夏日苦熱夜寢不寧

炎帝乘離日祝融司令辰江湖共沸鼎臺榭駐  
游塵宿鳥驚還語拳花笑復顰官叨伐冰後何  
處問凌人

夏日楊雲岳過訪

却憐三伏日忽遇百年知共散花間髮言攜竹  
裏棊興來還舞拂醉後漫題詩笑踏層冰去風  
流不自持

簡潤州門生李應山

絳帷撤已久無復見門生此夕華谿月應懸鐵  
甕城予今已衰颯君豈得無情願借南來鴈秋

江一寄聲

華谿予  
居里名

督府張公邀予暨許少岷使君同過紫陽

洞

仙人已飛去猶及見遺蹤巖臥餐霞洞林懸化  
鶴峯子房自澹宕我輩幸遊從他日封留後還  
攜訪赤松

晚由西湖上過宿聖水禪房

日暮西湖路行行野興多樓臺半倒景歌舞散  
煙波不見迎僧出惟看宿鳥過山靈併鐘磬邀  
我臥松蘿

五言排律

濟上逢張主客

丙午年予赴吏部  
時張丈出使還

驛路蟬聲裏征袍樹色間忽逢河漢使初犯斗  
牛還竝柵遵宵渚連鑣啓曙關未隨香署直早  
已客星攀紉珮江邊草開襟海上山相看似雙  
鵠刷羽向清沆

山田詠

有序

予家茗上少不習山田也予由臨安入  
歙諸州郡皆山而諸州郡之田皆附于



山及入歙中風氣尤別蓋土益窄人益稠所當剝崖分嵌穿溝引泉若繪事然此歙之所以獨盛不特薦紳先生多名卿也農而田野者無轆釜之憂商而四方者擅重裝之富金錢四溢流布海內也古所稱臨淄曲逆不是過已予特詠之以遺閭里焉

予家茗水上少不習山田墾均土魚鱗錯行行瓜蔓牽剝崖爬淺上甃石灌流泉高下綠崗落縱

橫綰棧懸詎聞衆立表僅可耦駢肩殷井崎難畫龜疇折不全嶇嶽紛甲乙巖嶮互糾纏虹影標丹巘星文鎖翠煙翦蓄成沃壤煮石號膏塿濶陘爭尋尺刀錐價十千不毛猶荷鍾無雨亦康年處處皆雲布村村竝貝編齒繁絕游惰地窄倍精專稊穗盈倉窳牛羊遍陌阡四封少菜色萬戶溢金錢寄語吳中少須知力穡先無令競統綺爲誦采風篇

白華樓吟稿卷之六

白華樓吟稿卷之七

歸安茅坤順甫著  
邑人姚翼翔卿編

七言律詩

高光州年丈載酒飲雲居蘭若適雨後晚  
眺城西諸山紀興

山色憐君載酒來  
雨餘偏向夕陽開  
輕霞欲散松蘿席  
餘靄還霑薜荔杯  
芳草叢中仙子宅  
鳴鳩聲裏越王臺  
攜遊盡日猶言少  
月上東林未

擬回

秋日江上懷何光祿賦寄

幾年同作悲秋客此日獨尋芳草堤門下談經  
憐舊侶省中供奉憶新題愁當白露江流滿望  
入晴原野戍迷寄語平津幕中客董生今已相  
膠西

贈大尹吳壽寧

君家幾話漢貂蟬復道專城屬少年綰綬暫隨  
彭澤後折腰莫厭督郵前清秋鳧鳥遊江岸海

縣鷺花散管絃此去徵書非所羨還期勳業繼  
先賢

李蓮湖叅政赴關右賦詩言別

李故杭州太守

江郡年來露冕遊忽聞使節下秦州不堪驛路  
鳴蟬擁况復郊原狎雉留華嶽祠前黃葉暮仙  
人掌上白雲秋銜盃共挹西湖水安得隨君萬  
里流

牛叅戎按師海上予訪第宅不遇題壁

樓船將軍東出師中天第宅花逶迤滿堂珠履

客散奕孤院碧梧禽戲枝簾開白雲晝當戶座  
引南山晴入帷我來停車一問劍氣射斗牛光  
陸離

聞朱射陂除服再補南刑部賦贈詩什兼  
柬潘太史天泉年丈

聞道仙郎耽寂寞清秋再向鳳凰臺初憐太史  
周南滯又見玄暉江左來樹裏碧湖春竝騎省  
中芳草夜銜盃遙知三署攜遊處不讓當年鄴  
下才

題許水部吏隱堂

水部風流今世稀省中別構綠雲屏風傳樹靄  
當軒落霧縮泉聲入座飛退食數懷題諫草林  
臯暫擬臥朝衣卽看方朔棲金馬何必抽簪事  
息機

晚行魯橋道中有懷

一眺城原秋水前數家砧杵夕陽邊初攀星色  
衣裳滿翻汴溪流鼓角傳飄泊羈愁隨落木蕭  
條驛路上寒煙故園今夜多搖落誰共山中聽

杜鵑

過紫府觀葦葛洪舊鍊藥處

仙人鍊玉構初臺海上笙歌去不回丹竈已隨  
芳草沒白雲猶傍女蘿開鐘鳴斷壁分青靄春  
到殘碑覆綠苔為報山靈許招社他年還抱道  
書來

沈冲菴還湖中

戊申年濟上適  
沈下第賦贈

青山驛路夕陽隨渺渺鄉心送故知况我南遷  
初召後併君獻賦未逢時論交共對長江水感

贈還期芳樹枝倘到故園秋色在頻將落葉寄  
新詩

夏日從南山迤邐轉宿龍潭江樓

竭來巒嶂望中迴復道江流掌上開路轉洞天  
題日月峯依水氣抱樓臺濯纓猶帶松蘿靄命  
酒初飛荷芰盃醉後憑闌攬河漢潮聲巖籟共  
徘徊

寄戚都諫南玄先生

明光罷草臥園廬長日頻翻種樹書地僻喜逢

林有竹家貧不厭食無魚姓名早挂高人傳門  
巷偏停長者車聞道先生多脚疾何當粟里御  
籃輿

燕磯贈友人

角巾懶入金陵市短棹頻過燕子磯載酒經時  
常共客看山盡日却忘歸蒹葭水際數峯出蘿  
薜窻中一鴈飛不獨揮毫冠江左風流亦倍謝  
玄暉

由幕府山尋達磨洞

雲開遙見峯頭寺谷轉還驚路不通笑踏泉光  
穿絕壁言隨麋跡到禪宮自疑羈旅同康樂錯  
訝迎僧是遠公千載蒲團何處覓數聲啼鳥夕  
陽中

史沱村考功給由赴京

史故  
御史

宣室徵車幾日還明光起草又經年爲郎自笑  
馮唐似白首應逢漢主憐朋舊半凋驄馬路衣  
冠重接 袞龍煙倘留待詔金門署長沐恩波  
雨露邊

春日踏雪彭城道中

春日獨傷春事稀  
馬蹄又向雪中歸  
數家煙火望欲斷  
幾樹飢鳥寒自依  
有客尋詩穿谷口  
無人載酒開林扉  
看山不覺日已暮  
千里雲霏生薜衣

過臺南寺

荒郊行遍少人煙  
半畝禪宮草樹間  
繫馬漫爲尋廢碣  
逢僧猶記自隋年  
閒看流水穿林坐  
靜對天花掃石眠  
世上榮華能幾日  
不如從此習

金仙

放衙偶述

吏人初散野情酣  
手把山經與麈談  
幾戲盆荷魚不避  
數題庭樹鳥能諳  
歐生自笑三宜去  
叔夜偏逢七不堪  
忽憶故園多綠水  
拂衣歸臥五湖南

同小潭宿彌陀寺

一入禪宮元淨業  
經行花竹靄霏微  
諸天半落金河水  
雙樹初懸白社扉  
臥聽經聲了色相  
起

攀龍象識故依明朝題字回廊上願乞山僧施鉢衣

熊抑齋太守攜酌醉翁諸亭

夕陽初下客欲醉復向梅亭近水筵樹裏遊人  
花作臘山中刺史酒如泉但教奕射歡今夕不  
問鶯花入宋年讀罷磨崖舊題字白雲分首各  
淒然

宿瑯琊寺

路入瑯琊峯幾千一行巖壑一行泉山僧獨臥

經時雪古殿仍棲落木煙谷絕不逢人跡到月  
明猶共佛燈懸夜深仙梵起微響笑對梅花雙  
樹眠

過定山寺謁定山先生墓

天竺先生去不回衣冠葬向白雲隈墓田許借  
山僧種祠屋應憐社燕來一徑松聲題梵處數  
峯秋色誦經臺沙門如有輪迴證爲起寒泉問  
劫灰

病後適初度奇上人誦經禳災口占謝之



山僧憐我文園病共向峰頭禮釋迦四十九年  
迷苦海百千萬劫總恒沙經聲西嶺通祇樹仙  
梵中天散覺花願乞世尊爲弟子從教髡髮具  
袈裟

過雲居山奇上人蘭若題壁

錢塘萬井綺羅煙別有僧扉鎖洞天雲雜松聲  
流谷口風來鳥語落窻前王孫芳草映堤綠處  
士梅花隔水懸到此諸緣成幻寂無論隱市與  
逃禪

九日同莫公遠遊寶石山寺次韻酬贈

登高能賦似君稀復道乘秋宴翠微上界盃前  
銀漢接中天題處絳雲飛乍看幾樹靈花散翻  
對千峯慧月依總屬仙才多藻什風流倍憶謝  
玄暉

胡少保攜師入閩幕中逢王十嶽沈勾章

徐天池賦詩送之

南征書記憐君輩竝屬當年鄴下才橫槊幾回  
江上賦看花還共幕中盃不堪夜色臨刁斗復

道秋聲起吹臺倘向軍前歸奏凱隨風須寄一枝梅

許蓋齋過湖中予感乙未下第竝轡南還之舊因而賦詩

雙縮鳴珂春逶迤相看獻賦未逢時幾年江上懸清夢此日花間感故知問齒應憐別後鬢論襟併出篋中詩知君不久周南滯却戀巖阿瓊樹枝

青門客遊京師歸劉望陽李珠山莫寒泉

同過宴集分韻得春字時莫初卜居湖上因併及之

不堪冰雪遠游人此日鸚啼社裏春彈鋏幾驚千里夢褰衣猶帶五陵塵醉看庭草綠樽滿笑倚巖花白髮新况復孤山林處士初移雞犬卜爲鄰

贈楊繕部止菴

楊雲早歲侍甘泉雙珮清秋迴列仙暫輟明光畫省草言徵南國水衡錢尋山湖上兼招隱散

吏花前似學禪復道年來多臥病閉門手著解  
嘲篇

晚秋荻江道中望城西諸山懷范太史

山色西來似畫眉風流縹緲望中移不堪鴻鴈  
霜初候况復蒹葭日暮時客路漸看秋欲盡美  
人何處寄相思愁心牢落周南上悵對洲前瓊  
樹枝

戊辰除夕喜青門過草堂分韻二首

故人十載隔他鄉此夕題詩共草堂臘色漸看

隨燭盡春風併已入林香當帷對草椒花頌促  
膝頻傳栢葉觴醉後牽衣同爆竹千家羯鼓報  
年芳

君是山中第一流遠攜春色過河洲庭前蕙草  
雙青眼巖下梅花共白頭歲向龍蛇分甲子天  
開日月轉林丘平生勝事須行樂總屬新年狎  
舊遊

蔡敬齋赴河南方伯兼簡李滄溟憲使

忽聞擁傳下中州一片離雲挂驛樓人向樟亭

題碧樹路分淮水駐孤舟停車擬弔夷門隱行  
郡還追鄴下遊爲報梁園詞賦客肯攜詩什寄  
餘不

爲寫神者董九華移書湖中諸友竝拒不  
納賦詩慰之

年來姓字頻驚座花下移書獨不聞共說閉關  
爭謝客誰令倒屣一迎君丹青錯訝毛延壽筆  
札空傳谷子雲却解平原非好士到今貽笑比  
山文

十六夜凌水部盛張燈宴以病不能赴寄  
詩一首

金谷園中春未深銀花千樹已成林乍看霞嶠  
中天落翻擬星橋向夕臨影亂畫屏人欲醉炬  
殘子夜漏初沉知君好客頻投轄獨倚東風思  
不禁

過張廷尉山亭宴集白牡丹盛開賦詠

不將黃紫鬪繁華獨愛山亭玉樹花枝上日光  
流絳雪叢中露氣濕瓊霞凌風乍似仙姬珮隔

帳翻疑雪母家醉後移文弔金谷何如澹宕幾  
株斜

錢塘邱舍遇冬至感賦兼懷元洲太宰

少年曾列尚書省老向西湖作客星緹室吹葭  
傳漢曆華封何處祝堯庭三台淑氣雲中現萬  
舞鈞韶夢裏聽遙憶上公鳴珮路却憐孤劔滯  
樟亭

送兒師徐三雅秀才

獨惜兒曹總角時春來叨列絳紗帷父書少讀

猶多誤師說初傳豈易知未擬靈光題賦草漫  
勞匡鼎解人頤林中不斷啼花鳥却似當盃怨  
別離

潘太史釋獄來歸題寄

十年久被南冠縶此日言歸太史廬共惜鄒陽  
沉疏草翻悲黃霸受尚書匣中且問故時劔池  
上還看手種魚聞說文姬頭未白花前膏髮待  
相如

胡公子過杭省先司馬公祠賦贈

翩翩公子胥江上薦藻先祠涕淚沱百二山河  
遺戰壘東南州郡舊提戈獨鏤幾慟鴟夷子惹  
苾堪憐馬伏波賦罷招魂腸欲斷猿啼故傍夕  
陽過

送閔秀才赴試

家學共推左氏傳高才又見小馮君鷓鴣早奮  
圖南翮驥裏還空冀北羣篋裏珮刀光射斗囊  
中賦草氣凌雲佇看首應賢良詔一日飛騰萬  
里聞

雨宿江上

曾聞宋玉賦悲秋春日鶯花亦解愁千里不堪  
風雨夕片帆長臥鷓鴣洲江雲渺渺三家市客  
路蕭蕭一敝裘無耐王孫芳草綠含凄猶似戀  
孤舟

過沈兵憲幕府

使君按節駐南州千里河山控上游幕府不聞  
搖白羽高牙初建臥輕裘鶯花萬戶絃歌散吳  
楚中分日月流天子明堂推渤海璽書應

拜富民侯

虹澗公移守肇慶賦詩送之

吏民借寇滿茗川萬里移家最所憐豈謂十年  
官不調却令千石綬初還峴山墮淚碑猶在  
天子徵書信早傳攜手那堪江水綠鷓鴣飛向  
夕陽前

桐江舟中風雨感懷

不堪宋玉悲秋色况復天涯風雨舟江燕俄驚  
舞石下山花併帶濯枝愁鮫人織室寒無語水

使雲幢濕欲流此日客星看不見煙波深處臥  
羊裘

送江中丞過鎮南贛

中丞按節過虔州 天子應無南顧憂不借  
材官徵白羽坐令幕府臥輕裘孤城鼓角樓船  
戍千里鸞花露冕遊異日璽書傳渤海賜還  
拜富民侯

寄鄞中施駕部年兄

曲江宴罷幾經年千里風塵興渺然君臥知章

半畝宅我攜范蠡五湖船青山社約憐盟主綠  
水漁歌誰扣舷此日題詩報東海一瓢可許共  
遊仙

贈中丞趙麟陽公

十年劔珮天涯隔此日煙花掌上看共羨朱雲  
曾折檻敢稱貢禹亦彈冠都亭舊識乘驄路星  
象重迎執法寒暫向周南非久滯壘書應擬五  
雲端

寄壽醫者王秋泉

猶記童年掉臂時忽看雙鬢已垂絲林間丹竈  
砂初熟海外碧桃花滿枝結社還推絳縣老遊  
仙休負鹿門期願言贈我長生草共向山中飲  
上池

越州陳一泉過醫室人已而東歸以詩送  
之

青兕西來紫氣翔忽逢道術抱岐黃囊中五色  
仙人草肘後千金不死方憐我已看起敝帚爲  
君早擬築丹房何時試買山陰棹手掇荷花秋



水堂

過天聖禪寺覽趙文敏公畫壁山水并張  
司理所題錯龍碑

碧山學士已不見畫壁龍宮第可憐五湖日月  
蟲書擁千里瀟湘石蘚懸斷碑野草沉綠字曲  
池鶴埵空寒泉張公移文一以弔百年初地迴  
金仙

日暮溪行聞蟬賦詩嘲之

不堪宋玉賦悲秋復道寒蟬向客舟初響塞雲

振林木餘音帶雨過江樓幾驚閨夢關山斷併  
入猿啼野戍愁却愛沙禽寂無語獨隨明月臥  
滄洲

郡守瑞菴公初度引觴入壽歌之以詩

使君初佩黃金印東海忽傳王母桃萬井兒童  
喧竹馬滿城笙吹奏仙韶雉迎露冕稱循吏花  
落公庭荷 聖朝天日西來多紫氣一年一度  
祝松喬

訪白野公賦贈

公抱耳疾

經時不過丈人行三徑那堪松菊荒王笠耳聾  
頻畫字阮生酒癖笑空囊杖藜猶怯苔侵屐灸  
背偏耽日轉牆願向中林習玄訣鴻濛何以答  
雲將

吳晉軒太守攜妾過蓮花館賦詩寄之

蓮花深處貯佳人縹緲煙波半洗頰樹裏爵釵  
紛落翠水邊羅襪不生塵醉同明月攜蕭史笑  
倚糝樓賦洛神復道西來山色黛不如太守畫  
眉勻

李臨川滿告還朝賦詩送之兼簡石廷尉  
淼淼煙波白露秋使君移節控鳴騶五湖鳧鴈  
牽行色千里關河入 帝州客路幾懸萱草夢  
星垣漸傍泰階遊省中舊侶如相問爲報山翁  
已白頭

郡守及臬公邸舍送陳舉人會試

太守幕中誰第一獨奇年少賈生才桂枝初擢  
秋風裏鴈塔還題北斗隈萬里雲霄花外近九  
天日月望中開春來匹馬經燕市再上黃金百

尺臺

茗上逢年家子錢舉人赴試

君家世受尚書學伯氏曾同聽鹿鳴江上忽逢  
年少客眼前又屬茂材聲神如秋水澄潭映氣  
似朝霞東海生預卜春來曲江宴杏花深處馬  
蹄輕

御史臺檄獎李邑諭鯤門持酒賀之賦贈  
幾年勾漏神仙令忽改秦官博士來垂綬猶疑  
抱琴吏檄書又羨出羣才笑看鴻鴈秋千里醉

飲芙蓉露一盃異日功成道東海却憐白石臥  
蒼苔

送蔡地官之金陵

少年曾侍尚書省此日仙郎劔珮臨六代繁華  
花外近九天宮闕望中深倘乘休沐名山出還  
共客遊芳草尋安得凌波燕磯上隨君霜夜聽  
潮音

堪輿趙生客遊江海者餘二十年矣陳敬  
亭移文導之歸賦詩一首

近得陳琳江上檄知君家世傍昆明丁年數卷  
青囊出白首一瓢滄海情萬里關山花外夢王  
孫芳草客中程夜依南斗瞻天象已卜使星馬  
首迎

始至廣右簡省中諸僚

憶昔題名留漢署何當捧檄向炎州數家雞犬  
抱官舍千里人煙盡成樓莫訝鸞花多異候漫  
誇山水勝中州諸君共草明光裏曾記南冠亦  
舊遊

海屋由廣濟令致仕歸適逢初度

海屋先生久宦遊忽聞海上夜添籌九天露裊  
金光草萬里雲開蜃氣樓且喜辭官投白社絕  
勝移令訪丹丘請君手種花千樹歲歲還同插  
滿頭

王舉人下第後秋日過訪山中賦贈

獻賦甘泉十載餘未聞明詔召相如赤霄雲氣  
囊中草白露風光花外車騏驎豈終槽櫪伏干  
將還薄斗牛墟漢庭首對未云晏好向山中讀

父書

題吳文學茗上草堂

君舊嘗爲樓按年月日時竝丁卯故字  
之爲四卯樓索予記久矣未及屬草頃  
復爲堂賦此

未及題君四卯樓又聞別構草堂幽紗窻半俯  
蒹葭市碧檻重開杜若洲滿壁圖書消白晝一  
簾琴奕貯清秋何當載酒花間醉臥看軒楹紫  
翠流

贈醫者王啓雲

少年結客入幽燕一擲曾輕百萬錢不惜橐裝  
金已散直教壚婦酒如泉晚尋瑤草雲深臥手  
著方書肘後懸共道五陵舊豪俠却逃海上習  
遊仙

贈胡大叅

胡舊爲  
德清令

少年佩印出專城復道銜恩向帝京江上幾  
看飛鳥影夢中猶狎抱琴情花迎方岳雲霄近  
星聚西湖象緯明此日招攜還太息共憐衰鬢

二毛生

病臥山中喜南石丈過訪

年來久不見樓卿此日支離下榻迎乍白乍青  
紛世眼一生一死見交情病魔漸向鳴禽解吟  
杖翻隨落葉輕醉別并期春社過桃花深處聽  
吹笙

病起送何醫還西湖并謝蒙近野公

韓康賣藥幾經年家住西湖秋水蓮神訣早餐  
上池水仙丹兼遇異人傳千金鵝蕊囊中出五

石方書肘後懸病骨如逢知己問已勝筇杖過  
花前

送有家弟移家練溪

千金不惜買名園君復移家傍近垣別業初分  
鴻鴈影卜鄰又共鵲鴝原未言奕酒耽賓客還  
以詩書授子孫異日百年喬木蔭翩翩甲第總  
高門

寄贈桐廬令李檢齋

江上琴臺高入雲抱琴爲令却逢君孤城流水

掌中瀉一曲陽春花外聞露冕幾隨馴雉狎放  
衙猶讀捕蛇文南州史業稱君最異日還看萬  
里勳

秋日過餘不溪懷史德清

江上忽聞流水音却疑單父弄鳴琴泠泠散入  
千峯色渺渺如褰孤鶴吟官舍遙連蒼靄曲訟  
庭應臥白雲深故人相望不相見芳杜秋光何  
處尋

七夕宿湖上大佛寺歌唐人詩云臥看牽

牛織女星適雲暗不及覩賦詩自解

天街此夕鵲填河閣道雙神佳氣多豈謂梵雲  
花外落却教仙珮暗中過共看織靄迷機杼何  
處含嬌渡綺羅欲狎年來問津者使星猶自滯  
煙波

同陳竹廬孤山社歸遇風雨口占

却怪山靈故鬪奇斜風細雨社歸遲林懸似對  
題詩障湖黑翻爲洗墨池孤寺梵鐘傳谷口一  
蓑漁笛過花枝掀髯共笑巾如沐不減淵明折

角時

松里先生招諸友社飲孤山得樓字

有序

孤山社故光州刺史高穎湖公所卜築也嘗邀予入社并碑大雅堂於其上已而光州公沒而社且屬之他人者久矣及索曩所爲碑已不可得語有之曰樂莫樂兮新相知悲莫悲兮故別離予故俯仰今昔不能不爲之低徊繫歎云

我投賦草弔光州半屬新知半舊遊歌吹再逢

今日社煙花不改昔年秋分曹對奕雲深竹落日攜壺水上樓綠字殘碑啼鳥外一翻歡賞一

翻愁

再過湖上

日日樽罍湖上攜煙花不盡使人迷孤山處士片雲墓十里王孫芳草堤半舞半歌金谷嶂欲晴欲雨輞川題興來醜酒六橋畔滿路秋光亂馬蹄

沈龍洲刺史載酒湖上同社中諸友共賞



蓮花得糝字

清秋何處美人糝嫩綠輕紅帶晚涼共指仙妃  
臨洛水却疑帝子渡瀟湘風枝歷亂珊瑚色露  
氣氤氳珠翠香十里煙波看不盡畫船簫鼓醉  
斜陽

酬沈鬱林

鬱林太守絕風流日日攜壺湖上游青筓綠蓑  
煙雨暮黃冠玉塵薜蘿秋吟邊天竺先生社杖  
底孤山處士丘憐我平生好詞賦頻將題什寄

滄洲

湖上逢徐賓梧吏部時適告病出沐賦贈  
不堪衰鬢臥清秋忽遇仙人海上遊採藥幾逢  
鵝蕊草看雲獨着鹿皮裘雙龍劒氣花間入五  
色煙波掌上收漫道尙書期不顧杖藜隨地訪  
丹丘

贈許南臺使君

年來宦轍半西湖三度錢塘興不孤帝子祠前  
投弔草仙人閣上醉攜壺戴星出入了公事載

鶴煙波自畫圖我亦罷官多澹宕數隨明月共  
招呼

別西湖寄社中諸君

年來不是悲秋客何事黯黯魂獨銷十里煙光  
邀別賦千條柳色挂河橋鮫人織室懷投杼神  
女凌波暗度簫我亦題詩寄明月知君不惜報  
瓊瑤

八月九日湖上得縉兒問書口占答之

七夕西湖詠女牛還家忽已近中秋只緣詩債

未能了爲惹山靈不自由日日舉花煙水畔朝  
朝載酒薜蘿幽欲知汝父杖藜處但看客星天  
際流

久客西湖聞郡太守及泉公病卽訪醫藥  
寄之

久客西湖作酒狂忽聞臥病似淮陽未逢印綬  
花間出却憶仙人肘後方五色金光鵝蕊草一  
瓢水碧露華漿緘題欲向西風寄目送歸鴻過  
夕陽

壽少谿伯兄

白頭兄弟世間少，兄復年逾七十三。  
花下數隨尋酒社，林中俱已厭朝簪。  
秋來大被連牀共老，去方書膝席談。  
聞說茅峯應不遠，還將仙訣祖堂參。

朱浹桂方伯公致仕歸餞之江上

看君意氣似秋雲，笑指江亭吳楚分。  
宦業年來成夢幻，人生那得惜離羣。  
暫遵初服尋仙訣，歸臥空山謝世紛。  
聞說罷官猶恨晚，到家不著解

嘲文

秋日江上得鄞中張生所攜石里光祿明

江太守兼惠茶筍紫菜

司馬帷中久已疎，清秋江上忽傳書。  
攜來玉案山中筍，錯出金光海上蔬。  
千里風塵憐故舊，百年日月共躊躇。  
欲將珮劍脫相贈，却愧仙人雙鯉魚。

過訪濮餘杭并尋洞霄宮

舊聞勾漏服丹砂，我亦來尋玉洞花。  
百轉巖泉

憑鳥道九天日月自仙家獨憐廢殿懸青嶂空  
憶前朝駐翠華願乞上清爲弟子黃冠長此臥  
煙霞

夜過蕭山贈陸大尹

陸機後裔稱豪俊此日江亭又見君花下掀髯  
疑列戟風前攬帶欲凌雲滿城佳氣中天落萬  
戶絃歌入縣聞復道夜深能好客戴星傳炬共  
論文

過越州訪翁見海司馬

一劍一瓢冰雪寒遠將衰鬢客江干爲尋知己  
輕千里却入深林訪舊歡三黜直臣曾展季中  
朝元老漢袁安相逢且醉花前酒無問彈冠與  
挂冠

壽邵越湖年丈八十

閩州太守早歸田天子推恩賜帛年花裏  
頻看養生訣杖頭數挂社遊錢已占郡國推三  
老絕勝蓬池宴列仙况復季公霄漢出豸衣戲  
綵歲星前

過訪陶新岑大叅寅丈

遷客南還過舊京  
明光視草共知名  
君推雋氣嵇中散  
我亦狂歌阮步兵  
翻憶雲霄同宦侶  
却憐江海故交情  
相逢縱飲追河朔  
無事花前問解醒

西歸錢塘適陸蕭山招宴席間口占

西出江亭日暮時  
使君攜酒過花枝  
牽衣笑縮錢塘渡  
膝席同看禹穴詩  
銀燭繡屏宵影亂  
嬌歌急管漏聲遲  
夜深不覺已沉醉  
猶向庭前勸

別卮

贈劉栢巖大尹

將樂帷中少結知  
於今俱屬白頭時  
休嫌歲晚罷朝請  
且向花前賦社詩  
君已早叅勾漏訣  
我今無復尚書期  
百年世事祇如此  
日日還過一局棋

陳寒泉司訓惠金盤露四罇賦詩謝之

憐君贈我芙蓉露  
疑是仙人掌上來  
色借九秋上池落  
香傳百和鬱金回  
渴呼不用陶潛漉  
狂

飲何辭袁紹盃復報東風添勝事梅花夜半隔  
窻開

聞南石丈病臥春夜過訪忽已他出題壁  
一首

聞君抱病臥江濱復道行歌谷口春欲向深林  
思攬帶却憐明月獨隨人棲枝孤鳥寒無語倚  
戶雙童夜候津自笑客星還自照中天看劍共  
誰論

送許吏部入朝

使君遊宦似馮唐白首猶爲漢署郎分省半開  
提督府故人已挂少師章花間再識千官面天  
上重含五夜香倘過明光尋舊草却憐十載阜  
封囊

昌化道中望齊雲巖

掌上星河落九天望中巖壑起孤煙笑看鳶站  
舉雲外復指芝房挂斗邊此日翠微猶下界明  
朝絳闕迥羣仙小臣千里陳明水敢向三清乞  
福田

東賀許太常穎陽

天上輶車徵貢禹郡中弩矢候相如已看舊學  
還東觀復道新恩典石渠朝請預占上相綬陞  
迎首出太官廚到來憐我文章癖無忘時時借  
賜書

雲巖途中絕不逢酒家馬上口占

連朝沽酒市已絕一路看山興可憐米汁不聞  
齋繡佛翅車何處口流涎子雲欲弔鴟夷日康  
樂愁耽屐齒年馬上洗瓢空逸調誰云醉後似

乘船

過淳安弔故相商文毅公

經術當年推貢禹風稜百世竝師丹幾傳抗疏  
獨持正不厭明時再罷官隧道碑銘今寂寞故  
園第宅半凋殘我投弔草江城上流水空林白  
日寒

庚辰春三月清明日同諸友登道峯絕頂  
晚酌歸雲菴賦此

天目西來佳氣多山河百二望中過千峯泉色

白華樓吟稿卷之七  
三十一  
縈衣帶萬井桃花照綺羅入壑已疑迷谷口穿  
林不覺到巖阿醉來欲向僧分榻笑指枝頭挂  
鳥窩

贈堪輿者吳雙峰

海上逢君白苧秋歸裝忽擬擁貂裘名山未遂  
馬嘶北賦別那堪鴈影流塵世數窺壺裏景衰  
年何處壑藏舟五雲聞說多佳氣安得重攜上  
一丘

白華樓吟稿卷之七



白羊樓吟稿卷之七

增明遺書卷之七

海上逢君白字秋歸裝忽擬羅裙表在

馬嘶北賦別那堪爲影流塵世教癡

乍何處空城青瓦雲間說多佳氣安得

